



SOMMAIRE DV DIFFEREND  
d'entre *Auguste, Marguerite, Anne et Jean Gal-*  
*lands demandeurs, et respectiuement deffendeurs.*

*Contre Denise Rouuet femme de René Surault deffenderesse,*  
*& respectiuement demanderesse.*



Effunt M<sup>re</sup>. Auguste Galland Aduocat en la Cour, pere des demandeurs, a formé deux instances à l'encontre de la defenderesse, affin d'estre acquitté de diuerses responce, ausquelles il estoit entré pour elle, & affin d'auoir remboursement de plusieurs sommes par luy desboursées, souz assurance des promesses d'indemnité, qui luy auoient esté baillées. Les instances estans en estat, partages furent faicts entre les demandeurs, & Denise Rouuet d'une succession commune, & pour re-

tour de partage les demandeurs estâs demeurez redenables de trois mil liures, il fut soustenu par leur pere, que ceste somme de trois mille liures deuoit estre compensée avec autres sommes, par luy demandées à ladite Rouuet, & a ceste fin presenta requeste: De sorte que l'instance de demande originaire fut jointe par Arrest avec celle du rapport de partage.

Ces deux instances estoient naturellement connexes, d'autant que les sommes demandées à ladite Rouuet, procedent du payement fait par M<sup>re</sup>. Auguste Galland, des arrerages d'une rente constituée pour l'acquisition de la maison escheue au partage des demandeurs, & à l'occasion de laquelle est deu ledit rapport.

Pour le fait: Le 2. Februrier 1582. fut fait vn contract, par lequel M<sup>re</sup>. François du Four, vend a M<sup>re</sup>. Auguste Galland certaines parts & portions és maisons, esquelles pendent pour enseigne S. Fiacre, & nostre Dame, moyennant la somme de 4800. liures, dont il bailla quittrance, mais comme il n'auoit rien esté payé contant, ledit Galland constitua 400. liures de rente au profit dudit du Four.

En ceste acquisition M<sup>re</sup>. Auguste Galland n'auoit aucun interest, & ne faisoit que prester son nom à Marguerite du Viuier sa belle mere & à ses enfans, aussi le 2. Iuillet 1585. il fit vne declaration, contenant que l'acquisition par luy faicte, estoit au profit de sa belle mere & enfans, ausquels entant que besoin seroit, il faiçt retrocession: & moyennant ce, ils promettent le rendre indemne, à cause de ladiète acquisition, & payer à l'aduenir la rente, à peine de tous despens, dommages & interests.





Les troubles estans suruenus, Robert & Denise Rouuets sortent de ceste ville, sans moyens : ils sont recueillis à Tours par Mre. Auguste Galland leur Beaufrere, lequel les a assisté de toutes sortes de commoditez : Il leur a continué la mesme courtoisie en la necessité de leurs affaires, depuis la reduction de Paris, en leurs procez ou maladies, sans qu'ils luy en ayent voulu faire raison.

L'acquisition de ceste portion de maison luy a causé diuers procez, il a esté poursuiuy de la part de Monsieur le Cardinal de Gondy Seigneur censier, affin de payement des lots & ventes, & par du Four vendeur des maisons, affin de payement des arrerages de la rente.

*Poursuite  
par le sieur  
de Gondy.*

Les traueses de ces deux instances ont esté longues. Monsieur de Gondy a demandé les lots & ventes deuës à cause de l'acquisition, instance aux Requestes, les Rouuets ont esté sommez de faire cesser, sentence rendue au profit dudit Seigneur, portant condamnation de 400. liures pour lesdits droicts : appel par Galland, denoncé à Denise Rouuet, qui a demandé estre receue partie pour faire infirmer la sentence. En fin, arrest portant confirmation de la sentence, avec condamnation de despens contre ledit Galland, liquidez à 205. liures, tant de sols, reuenant le tout à 605. liures 5. sols. Et en vertu de cet Arrest, les loyers de la maison escheue aux demandeurs en partage, avec Denise Rouuet ont esté faisis entre les mains des locataires, de sorte que les demandeurs ont esté contrains passer consentement, au profit dudit sieur Cardinal, pour la deliurance desdits deniers.

*Poursuite  
par du Four.*

Quant a du Four, il a poursuiuy ledit Galland, afin de payement des arrerages de la rente, a obtenu Arrest le dernier Iuillet 1599. portant condamnation de payer, & renouveler les assurances: faute de satisfaire, à obtenu autre Arrest portant condamnation de rachepter: Aïât fait saisir entre les mains de Mre Hierosme de Varades vne somme notable, appartenant audit Galland, par autre Arrest du 17. Aoust 1602. il a fait dire qu'elle luy seroit deliurée : & par ce moien la somme de 1200. escus est demeurée arrestée pres d'un an & demy. A la diuersité de ces instances, ledit Galland a supporté de grands frais, & pour les arrerages de ladite rente, & payement des executoires de despens a debourcé de notables sommes: En fin en Mars 1603. ceste rente fut racheptée des deniers de la succession de feu Robert Rouuet. Mais depuis le rachapt, ledit Galland estant encores poursuiuy pour quelques arrerages & executoires de despens, & d'ailleurs trauersé par ledit sieur de Gondy, fit assigner ladicte Rouuet heritiere de son frere, & pour lors seule heritiere en apparence de feu Marguerite de Viuiet sa mere, (d'autant qu'elle controuueroit aux enfans dudit Galland, la qualité d'heritiers) afin de le descharger de la poursuite faicte à l'encontre de luy par Monsieur de Gondy, pour le payement des lots & ventes par luy demandez, dommages & interests, tant en demandant qu'en defendant. A en outre conclud, afin de remboursement des payemens par luy faicts à du Four ou Claude Thiballier son cessionnaire, tant en arrerages que despens, dommages & interests : mesmes pour l'Arrest faict des deniers entre les mains dudit de Varades, & en outre affin que le contract de constitution, auquel il est obligé, fut deschargé, & coppie à luy fournie de la descharge, à ce que à l'aduenir ses heritiers n'en fussent trauallez.

*Premiere de-  
mande dudit  
Galland.*



Ce sont les conclusions prises, tant par l'exploict que par les demandes incidentes.

Pour le regard du sieur de Gondy, la deffenderesse a consenty au procez, en acquitter ledit Galland, partant ne reste qu'à prononcer: lors de l'introduction de l'instance, elle a esté bien poursuivie pour l'acquit entier enuers ledit sieur, car elle paroissoit seule heritiere, mais à present les enfans dudit Galland consentent le tiers, estre confus en eux.

Consentement  
de Rouuet  
pour le sieur  
de Gondy.

Quant au fait de la rente, il depend de la lettre d'indemnité baillée audit Galland, qui tire avec soy l'adiudication de tous despens, dommages & interests.

Depuis ceste demande le 11. Decembre 1607. ledit Mrs. Auguste Galland fit vne nouvelle demâde, pour auoir payement de plusieurs sommes par luy prestées ou desboursées pour ladite Rouuet & son frere, comprises en quatre formulaires de compte à luy presentez par feu Rouuet escrits de sa main, & reconnus par deux testaments holographes.

Nouvelle de-  
mande dudit  
Galland.

Ces instances ont pris leur cours, & s'est deffendue ladite Rouuet par toutes les ruses qu'elle a peu imaginer: & voyant n'auoir plus moyen de fuyr, le 27. Ianuier 1609. elle a fait signifier vne quittance generale, qu'elle suppose luy auoir esté baillée par ledit Galland le 8. Nouembre 1601. exhibée audit Galland le 28. le lendemain, il s'inscrit en faux contre icelle.

Les moïens de ladite Rouuet contre les demandes sont, premierement qu'il y a vne quittance generale du 8. Nouembre 1601. à quoy ne faut autre responce que les moyens de faux, & la seule inspection oculaire de la piece, fait cognoistre la fausseté.

Moïens de  
Rouuet.

1.  
Quittance  
generale.

Elle dit en second lieu que Mrs. Auguste Galland à reconnu ne luy estre rien deu, à cause de ladite rente ou autrement, d'autant que lors de la distribution des deniers adiugez à la succession des Rouuets contre le sieur Comte de Saignes, il se contenta de toucher la somme de 600. liures sur les aduances par luy faites, & a ceste fin induit l'Arrest du 18. Mars 1603.

2.  
Arrest du  
18. Mars  
1603.

La responce a ceste imposture, se tire des termes de l'Arrest mesmes. Le surplus desdits deniers qui pourrôt estre congneuz au Greffe de la Cour, pour lesquels ont esté mis en ordre, demeureront és mains dudit sieur Tillet, iusques à la concurrence de ce que ledit Galland l'aisné affermera auoir esté payé de ses deniers, pour les arrerages de la rente, deue ausdits du Four & Thiballier. Au payement de laquelle somme demeureront lesdits deniers specialement affectez & obligez, sans qu'ils puissent estre detenus ou pretendus par autres creanciers de la succession desdits Rouuets. Comme pareillement demeurerôt lesdits lieux de l'image S. Fiace obligez & hypotequez audit Galland, iusques au parfait payement d'iceux. Tant s'en faut donc que de cest Arrest l'on puisse induire vne presumption d'acquit contre ledit Galland, au contraire il contient vne reseruation precise.

Tertio, elle dit que par Arrest du 24. Iuillet 1603. ledit Galland à consenty, que ce qui restoit de deniers congneuz au Greffe, appartenans à la succession desdits Rouuets, fut employé au payement des espices du procez, contre la Damoiselle de Laube.

3.  
Arrest du  
24. Iuillet  
1603.

Responce, il y auoit vn grand procez important à la succession, contre la Damoiselle de Laube, C'estoit vn ennemy commun, qu'il falloit combattre a for-



ces communes: Les Rouuets escriuent audit Galland, comme il iustifie en sa production sur sa nouvelle demande lettre E. qu'ils n'auoient point d'argent, le prient les en assister, il fait diuerses aduances, comme ladite Rouuet reconnoist par son inuentaie, sur la nouvelle demande lettre S. & ne desirant d'auantage desbourser du sien, il consentit que lesdits deniers restans consignez & appartenās à la succession, fussent deliurez ausdits Rouuets, pour employer à faire iuger le procez, contre l'aduersaire commun de la succession. Et le mesme jour de l'Arrest lesdits Robert & Denise Rouuet luy firent vne promesse, de leur main, produicte de nouveau lettre F. par laquelle ils s'obligent n'employer lesdits deniers ailleurs qu'aux vacations & espices dudit procez. Il scauoit que son droit ne luy pouuoit deperir, veu que naturellement la maison dont l'achapt auoit donné suject à la creation de la rente luy estoit obligée, & que l'hypoteque luy estoit reserué par l'Arrest du 18. Mars.

<sup>4.</sup>  
*Affirmation*  
*du 13. Iuin*  
*1603.*  
Quarto, elle dit que le 13. Iuin 1603. ledit Galland interpellé par la Cour, de declarer ce qui luy estoit deu par lesdits Rouuets, a affirmé qu'il ne luy estoit deu que quatre cens escus, dont elle induit que le surplus des sommes a elle demandées, ne sont point deues.

Ceste obiection est captieuse, & gauchit le sens & les termes de l'Arrest: car lors de l'affirmation mentionnée audit Arrest, il n'estoit pas question des sommes aduancées ou payées par ledit Galland, ains seulement de la descharge qu'il desiroit de celles, dont il estoit respondant & caution pour Rouuet. Les termes de l'Arrest le monstrent clairement. L'Aduocat des Rouuets conclud, afin de mainleuée de la saisie faite, faute d'auoir fait ce qu'ils ont acquitté. Le mot (acquitté) fait cognoistre qu'il s'agissoit de saisie faicte pour fideiussion & debte, dont ledit Galland deuoit estre acquitté enuers personnes estranges, & non de ce qui luy pouuoit estre deu. Et adioustel' Arrest, que ledit Galland a *soustenu ses saisies pour n'estre deschargé des debtes alleguées, & par ledit Galland affirmées*, monter à quatre cens escus. Ainsi les quatre cens escus se rapportent non aux debtes particuliers dudit Galland, ains aux sommes dont il estoit respondant, & desquelles il demandoit estre deschargé. Aussi la saisie dont la mainleuée est ordonnée par ledit Arrest, auoit esté faicte à la requeste dudit Galland le 2. Septembre 1602. pour estre deschargé, d'une responce de huit escus vn tiers de rente enuers Mre. Hugues le Procureur en la Cour, comme il se void en la premiere production de ladite Rouuet lettre en la nouvelle production desdits demandeurs lettre D.

*Pour mon-*  
*strer que*  
*l'affirmation*  
*des 400. es-*  
*cus ne se peut*  
*raporter*  
*aux debtes*  
*dudit Galland*

*Toutes ces*  
*pieces sont*  
*produictes*  
*par toutes les*  
*parties.*

D'ailleurs, pour monstrier ceste verité, & quel l'affirmation ne se peut entendre des sommes particulieremēt deues audit Galland, c'est que long temps au parauant la distributiō des deniers deus par le comte de Saignes, qui fut faicte le 18. Mars 1603. ledit Galland fit cognoistre qu'il desiroit estre satisfait de ce qu'il auoit payé pour les arrerages de ladite rente, & despens par lui soufferts. C'est pourquoy par Arrest du 11. Ianuier 1603. il est dit qu'il baillera estat des sommes par luy payées: le 24. par autre Arrest, il est dit qu'il affermera ce qui luy est deu par lesdits Rouuets, le 29. il fait bailler à Rouuet coppie de toutes les quitrances & autres pieces iustificatiues des payemens par luy faicts à du Four, à cause de ladite rente. Rouuet fait responce, que ledit Galland doit affermer si les payemens ont esté faits de ses deniers. Le 11. Mars, il fait son affir-



5  
mation par deuant Notaires, laquelle n'est point signifiee, c'est pourquoy par l'Arrest du 28. Mars, lors de la distribution desdits deniers, il ne touche que 600. liures, & est dit que les deniers conſignez luy ſeront deſliurez iuſques à la concurrence de ce qu'il affermera luy eſtre deu: le 16. Iuin il fait ſignifier ſon affirmation aux Rouuets, par laquelle il affirme le contenu en toutes les quittances contenues en l'acte du 18. Mars luy eſtre deu, ce ſont les meſmes ſommes du payement deſquelles il s'agiſt.

Ainſi la Cour void, que ſelon la diuerſité des choſes, il y a eu diuerſité de pourſuittes, l'affirmation mentionnee en l'Arrest du 13. Iuin eſt des ſommes dont il eſt reſpondant, celle du 16. eſt des ſommes par luy deſbourſees pour la rente, autrement ceſte affirmation poſterieure euſt eſté vaine: ceſte piece eſt en la production de D. Rouuet lettre C. piece 16.

Dauantage les ſommes demâdees par ledit Galland en l'vne & l'autre de ſes demandes, eſt iuſtifiee par les quittances de du Four & Thiballier, & par les eſtats eſcripts de la main de Rouuet recogneus par ſes teſtamens, dont l'un eſt de l'an 1600. Lors les Rouuetz eſtoient miſerables, logeoient en chambres garnies avec beaucoup de neceſſité, comme porte l'un deſdits teſtamens. Puis que les quittâces ſont pardeuers le fidejuſſeur: que l'on ne iuſtifie point de remboursement poſterieur, fault il pas de neceſſité conclurre que les ſommes ſont encor deües? & ne ſçauroit ladite Rouuet dire, de quel endroit elle euſt peu lors auoir moyen d'acquitter leſdites ſommes, qui ſont notables. Et de faiſt des ſommes baillees audit Galland, en acquit de partie de ſes aduances, & dont les demâdeurs conſentent la deduction, il n'y en a aucune fournie des deniers de Rouuets, ains ont toutes procedé d'ailleurs. Les 800. eſcus furent preſtez par Mre. Auguſte Galland, comme les 66. eſcus: & les 200. eſcus furent baillez, des deniers conſignez, les 300. eſcus de remboursement des deſpens du procez contre le Comte de Saignes, furent fournis par ledit Seigneur. Bref auant l'Arrest du 18. Mars 1603. leſdits Rouuets n'ont pas eu le moyen de fournir aucune choſe, tant s'en faut qu'ils ayent peu acquitter ces ſommes notables.

En cinquieme lieu Deniſe Rouuet dit, que ledit Galland a touché quelques ſommes d'elle ou de ſon frere, les demâdeurs conſentent eſtre deſduit, ce qui ſe trouuera auoir eſté receu.

Sexto, d'autant que ledit Galland outre les ſommes payees, à cauſe de ladicte rente & autres contenues aux quatre comptes & teſtamēt, à requis en ſa nouuelle demande, le payement de pluſieurs autres ſommes montās a plus de 600. eſcus pour argent preſté, ou fournitures faiſtes auſdits Rouuets. Ladite Rouuet pour exclure tout ce qui precede l'annee 1590. à laquelle commencent leſdits eſtats de compte, dit qu'en ladite annee 1590. le 27. Mars, elle & ſa deſſunte ſœur Marie, feirent compte avec la femme dudit Galland, de tout ce qu'ils auoient eu affaire enſemble, & que par l'iſſue du compte leſdits Rouuets demeurerent quittes de tout le paſſé, & ledit Galland redeuable de 355. eſcus.

A quoy diuerſes reſponces, la premiere, ce compte pretendu n'a peu obliger ledit Galland, ayāt eſté fait par ſurpriſe avec ſa femme, ſans charge & pouuoir: Lors qu'il luy a eſté obieſté, il l'a deſaduoué & ſouſtenu qu'il ne le pouoit lier: Au procez verbal fait deuant Mr. Florette du 29. Nouembre 1602. au procez verbal de Naullet du 13. Iuin 1606. en ſes contredits à la production pre-

Les Rouuets  
n'ont iamais  
arresté de  
compte.

N'ont eu  
moien de  
payer.

Les pieces  
ſont par de-  
uers les de-  
mandeurs.

5.  
Payemens  
faicts à Gal-  
land.

6.  
Obieſtion  
contre les  
ſommes deues  
auant l'an  
1590.  
Compte fait  
avec la fem-  
me dudit ſeu  
Galland.  
Deſaduoué  
par ledit  
Galland.



*Dol audit  
compte.*

miere de ladicte Rouuet lettres C. P. S. & par sa production nouvelle lettre K. *circa finem*. L'ayant desaduoué des l'an 1602. & en iustice, il estoit du deuoir desdits Rouuets, de requerir qu'il fut déclaré vallable, ce qu'ils n'ont point fait. La seconde responce est que ce pretendu Arrest de compte n'a autre fondement que l'imposture desdicts Rouuetz, ayant rendu reliquataire celuy enuers lequel ils estoient redevables: car par les pieces produites, il se iustifie qu'ils deuoient audit Galland plus de 600. escus pour aduances ou fournitures precedentes l'an 1590. & ne sçauoient monstrier que ledit Galland leur deut aucune chose. S'ils ont abusé de la facilité de leur sœur, & fait arrester vn compte sur des suppositions, il n'est raisonnable qu'ils en tirent aduantage. Il n'est pas dit par ce pretendu arresté que les pieces ayent esté rendues, Celles dudit Galland sont demeurees par deuers luy, & la promesse dont les Rouuetz se seruent encor aujourd'huy est en leur possession, il leur est facile de venir, si bon leur semble, a nouveau compte.

*Responce à  
la procuratio  
du 29. May  
1588.*

Ladicte Rouuet pour se garantir de ceste nullité, dit que le compte a esté fait en vertu de procuration passée par Mre. Auguste Galland à sa femme, en la ville de Baugency, le 29. May 1588. lors qu'après les barricades il se fut retiré de ceste ville. Ceste procuration neantmoins ne baille aucun pouuoir de compter

*Responce à  
la missiue.*

avec ses sœurs ou le rendre redevable, ains de poursuiure les creanciers dudit Galland & conduire ses affaires. Elle adiouste que ledit Galland par vne missiue a donné pouuoir à sa femme de compter avec son frere & sa sœur. Aquoy a esté respondu, & monstrier par la requeste seruant de contredit, qu'il plaira à la Cour voir, que ladite missiue a esté escriite par ledit Galland depuis la reduction de la ville de Paris, en l'obeissance de sa Majesté: & puis que ledit Galland escriuoit lors à sa femme, quelle vint a compte avec son frere & sœur de ce qu'elle leur auroitourny, Cest vn argument indubitable qu'il ne sçauoit rien de ce compte pretendu de l'an 1590. La missiue n'auoit pas vn effect retroactif pour confirmer vn acte precedent, nul: Plus il ne baille pas pouuoir à sa femme de le rendre reliquataire, ains seulement d'arrester ce qu'elle auoit presté &ourny à ses frere & sœur.

*La requeste  
du 18. Mars  
contient le  
contredit à  
la missiue.*

Partant ledit compte nul, & ne peut ladite Rouuet demander le pretendu reliqua, ou empescher la demande qui luy est faicte des chosesournies auant le compte.

*Nouvelle de-  
mande.*

La nouvelle demande dudit Galland, pour les prests ou fournitures faictes depuis l'an 1590. est fondee sur quatre estats & deux testamens, pour l'intelligence desquels, est a remarquer, que pendant la necessité desdicts Rouuetz, ledit Galland les ayans assisté, il ne les a pas pressé de paiement, cognouissant qu'ilz n'auoient pas moyen de satisfaire. Mais desirant s'esclaircir, il a souuent prié Robert Rouuet luy en fournir estat pour l'arrester il luy abailé quatre cōte-reaux en diuers tēps, tous escrits de sa main, & cōtenāt les sōmes dont il se recognoissoit redevable, & par deux de ses testamens, il tōbe d'accord de la verité desdites debtes, Ces estats ont tousiours esté impugnez par ledit Galland, acause de plusieurs defectuositez. Mais ledit Rouuet decedé, il a estimé qu'il pouuoit verifier son intention par ces pieces, sans toutesfois les approuuer aux articles de recepte supposez faictz par ledit Galland, non iustifiez, qui sont inferez pour absorber partie desdicts frais & fournitures.



Denise Rouuet pour eluder ceste demande, apporte diuerſes reſponces impertinentes.

Elle dit en premier lieu, que les parties ſont venues a compte de tout le contenu en ces comptereaux, que Galland du viuant de Rouuet n'en a point fait demande, & que ces comptereaux luy ont eſté ſouſtraicts par Marie de Lancé ſa domeſtique qui les a deſliurez audit Galland.

Ce qui eſt faux ſauf correction: Eſtant la verité telle que les quatre comptereaux ont eſté en diuers temps deſliurez par Rouuet audit Galland, lequel les a gardez pour ſ'en ſeruir, venât à vn compte final. Et de fait l'an 1602. le 9. Aouſt, ledit Galland ſe conſtitua demandeur contre les Rouuets, afin de recognoiſtre pluſieurs papiers, pour la recognoiſſance faiçte eſtre condamnez à payer le contenu en iceux. Ceste piece eſt produicte en l'inſtance de faux lettre G. piece 3. & 4. en conſequence dequoy en Nouembre enſuiuant, les parties ont comparu par deuant Mr. Florette Conſeiller aux Requeſtes commiſſaire. Par deuant lequel ledit Galland representa toutes les pieces, dont par apres il entendoit faire demande, & entre autres il a preſenté le premier deſdits comptereaux, lequel eſt reconnu, eſcrit de la main de Rouuet fol. 12. verſo dudit procez verbal produit par Galland en ſa produçtion de nouuelle demande lettre M. & eſt ledit eſtat inferé au long au procez verbal dudit ſieur Commiſſaire, deliuré à la dite Rouuet fol. 33. par elle produit ſouz la lettre F. en la nouuelle demande. Ainſi ſe void que le comptereau n'eſt point vne piece nouuellement miſe en auant, & que des l'an 1602. ledit Galland en a pretendu le payemēt qui n'a point eſté contredit par les Rouuets. Galland n'en fit recognoiſtre qu'un, eſtimant que la recognoiſſance des autres ſeroit ſuperflue, veu qu'ils ſont tous ſemblables. Par le moyen de la recognoiſſance, il eſtima eſtre aucunement aſſeuré: & environ ce temps eſtant ſuruenü quelque forme de reconciliation entre eux, (comme dit Denise Rouuet en ſon inuentaire ſouz la lettre G.) la pourſuite en a eſté intermiſe.

Et partant il ſ'enſuit que le contenu aux comptereaux, ayant encor eſté deu en Nouembre 1602. il y a preſomption *adhuc deberi*, ſi l'on ne fait apparoir de payement.


A la verité le 9. Feurier 1608. Gillette de la Rue deſliura audit Galland deux teſtamens de Robert Rouuet portant recognoiſſance des choſes deües audit Galland: Mais pour leuer toute ſuſpicion il luy en baille deſcharge par deuant Notaires. Quant aux comptereaux Galland les auoit receu dudit Rouuet, auquel des l'an mil ſix cens deux il en auoit fait recognoiſtre vn: des l'vnzieſme Decembre 1607. la nouuelle demande a eſté formee; fondee ſur leſdicts comptereaux, & les deux teſtamens ont eſté recourez par ledit Galland le neufieſme Feurier 1608.

Elle dit en outre que l'on ne peut induire conſequence deſdits teſtamens, d'autant qu'ils ont eſté reuozquez par vn poſterieur. Aquoy diuerſes reſponces. La premiere, que la demande n'eſt pas fondee ſur leſdicts teſtamēs, mais ſur les comptereaux: & ſont les teſtamens produis pour montrer qu'en l'an 1600. que fut reueu le dernier rien n'auoit encore eſté acquité. *Secundo*, la reuocation des teſtamēts precedés faiçte par Rouuet irrité contre ledit Galland, avec lequel il plaidoit, ne le peut pas deſcharger, & eſt choſe vulgaire en droit que d'un



acte nul ou reuoqué demeure tousiours preuue de la verité recognue, & ne se peut rien voir de plus precis que la recognoissance desdits testaments. Celuy de 96. reuoqué le 25. Auiil 1598. porte que Rouuet veut que ledit galland soit payé, tant pour sa pension à Tours que de ce qui luy pouuoit auoir baillé, selon le compte qui en sera faicte par Denise Rouuet sa sœur, à quelque somme que le tout se puisse monter. Et par autre testament du 25. Auiil 1598. receu le 5. Nouëbre 1600. il fait pareille recognoissance, ceste verité est trop ferme pour estre affoiblie par vne simple denegation posterieure.

Elle dict en dernier lieu, que s'agissant d'aliments & fournitures, la demande en est trop tardiuë. Responce *primo*, la protestation de l'an 1602. *Secundo*, l'ordonnance ne s'entend pas des recognoissances par escrit. *Tertio*, la demande n'est pas seulement de nourritures, mais d'autres fournitures, les nourritures sont la moindre partie de la demande.





# SOMMAIRE DES

## MOYENS DE FAVX, CONTRE LA

QVITTANCE GENERALE DV HVICTIESME


Novembre 1601. Produitte par Denise Rouuet.

**L**A fauceté, se iuge par la seule inspection oculaire de la piece: Ce que la deffenderesse appelle quittance, est *une forme de transaction de huit diuers differents, non en papier, comme il est ordinaire, non pardeuant Notaires, ce qui eust bien esté desiré pour la consequence & importance, mais sous sein priué, & sur vn petit placart de parchemin vieil, fouppey, percé en diuers endroits, mesmes aux costez, raclé en plusieurs lieux & adouci avec la pierre ponce: C'estoit vn blanc autresfois signé par feu maistre Auguste Galland, pour fournir à quelque débiteur, ou payeur de rentes ou gages, lequel ayant esté soustrait par ladite Denise Rouuet pendant qu'elle demuroit domestiquement avec luy, & longuement gardé, a esté par elle remply: ce qui se cognoist par l'endossement, à l'endroit de la signature, en ces mots, pour servir de quittance, à ceste seule remarque doit faire iuger la fauceté. Tels endossements ne se mettent iamais qu'és blancs pour fournir ou à personne incertaine, ou pour somme non asseurée, aussi industrieusement en la coppie qui en fut fournie au deffunct le 27. Ianvier 1608. l'endossement a esté obmis.*

Les lettres & lignes ont esté pressées sur ce petit parchemin dont elles voisines le bord, à fin de les faire quadrer à la signature: mais comme elles n'auoient pas esté bien compassées, il y a deux lignes qui ajambât dans le trait du G. qui est la premiere de la signature.

Si ce n'estoit vn blanc-signé remply, la signature n'eust anticipé dans le texte, & les lettres voisines de la teste du G.

A





n'eussent esté eslongnées des lettres d'un si grand espace, comme elles sont, de peur d'entreprendre sur le trait.

Au dessous de l'écriture, il y auoit beaucoup d'espace blanc pour faire la signature en liberté, sans anticiper dans le texte: Ceste anticipation monstre que l'écriture a esté asseruie à la signature: Ce qui faict cognoistre combien faucement ladite Rouuet en son interrogatoire *fol. 3. verso*. A soustenu que le seing de ladite pretendue quittance auoit esté mis depuis le corps de l'écriture: Car si le corps de l'écriture eust precedé la signature, en vain eust esté mis cest endossement *pour seruir de quittance* a. Et est à croire que la signature, veu l'espace vuide qui est au bas n'eust remonté dans l'écriture.

Plus, il faut que ceste signature ait esté faicte plus de vingt cinq ans auparauant le datte, & lors que ledit Galland, ieune, auoit la main legere & hardie: car en Nouembre 1601. il estoit aagé de plus de 74. ans, avec la main tremblante & lourde: comme il se pourroit iustifier par comparaison avec pieces authentiques: cest pourquoy ladite signature a esté sur-chargée d'encre, la sur-charge est visible, fors aux liaisons & autres traits plus delicats, qui n'ont peu estre sur-chargés aussi ils paroissent plus rouges.

L'encre de la signature est diuersé de celle de l'endossement; combien qu'ils doiuent estre de mesme temps: la signature qui a esté sur-chargée est plus noire, l'endossement qui n'a point esté renouuellé est plus blaffart.

Mais il n'est besoin d'entrer en la longueur de ceste discussion, car la piece parle de la femme dudit Galland comme deffuncte (*avec ma feu femme*) & neantmoins elle n'est decedée que long temps depuis, à sçauoir le 26. Iuillet 1602. qui sont pres de neuf mois. L'extraict du registre de mortuaire dudit iour est produit. Et de faict le cinquiesme Decembre 1602. qui sont huit mois moins trois iours apres le datte de ladite quittance, ladite Rouuet & son frere font assigner la femme dudit Galland comme viuante, pour respondre sur diuerses conclusions: mesmes pour declarer si elle veut se



3

porter heritiere de ses pere & mere. Et le mesme iour cin-  
quiesme Iuin 1602. ils font appeler ledit Galland à fin d'au-  
thoriser sadite femme: C'eust esté des conclusions ridicules  
si elle eust esté decedée auant le mois de Novembre de l'an-  
née precedente: Mais Dieu à voulu que Denise Rouuet fut  
aueuglée, & que la memoire luy defaillit en son mauuais  
dessein.

Plus, les longues contentions d'entre les parties, durant  
lesquelles ceste piece n'a point esté mise en lumiere, est vn  
argument indubitable du faux.

L'an 1602. en Iuillet se meut vne contention entre lesdits  
Rouuet & maistre Auguste Galland, sur la representation de  
tous les papiers qu'ils auoient concernans la succession: Mai-  
stre Auguste Galland poursuit les Rouuets à fin de recognoi-  
stre ceux qu'il represente aujourdhuy, & par vn acte & vne  
requeste verbale du 9. Aoust, ledit Galland conclud à ce que  
lesdits Rouuets recognoissent les memoires par eux escrits,  
des sommes dont ils ont esté assistez; pour la recognoissance  
faiite estre condamnez au payement. Le quatorziesme du-  
dit mois il conclud à fin de remboursement des arrerages de  
rente par luy payez à du Four, eust-il esté *adeo perfri&e frontis*,  
de demander la recognoissance de toutes ces pieces & rem-  
boursement des arrerages payez à du Four, si en Novembre  
precedent il en eust fourny quittance.

En consequence de ceste poursuite, en Novembre audit  
an 1602. les parties comparent pardeuant monsieur Florette  
Conseiller aux Requestes, Galland represente toutes les pie-  
ces sur lesquelles depuis il a fondé ses actions, en demande la  
recognoissance, elles sont recognues pour exceptiō, les Rou-  
uets proposent deuât M. le Commissaire qu'ils ont vne quit-  
tance generale de l'an 1585. & vne autre de l'an 1590. Mais de  
celle que l'on represente aujourdhuy de Novembre 1601. *ne*  
*verbum quidem*, il n'est pas à croire qu'ils l'eussent obmise si  
elle eust esté veritable; car c'eust esté vne fin de non receuoir  
peremptoire contre ledit Galland pour l'exclurre de toutes



4

pretensions, & pour vuidier tous les differents; mais elle n'estoit pas encor fabriquée.

Plus, en l'année 1603. Ayant esté adiugé à la succession cōmune des parties, vne somme notable, sur le sieur Cōre de Saignes, Galland s'oppose à la deliurance pour estre deschargé de la rente dont il estoit respondāt enuers du Four, où Tyballier son cessionnaire. Les Rouuets ne mirēt point en auāt ceste quittance, qui eust esté decisiue. Au cōtraire sur la playdoirie, interuint arrest le 21. Ianuier 1603. par lequel est dit que Galland baillera par estat les sommes par luy payées à du Four: s'il y eust eu quittance de Nouembre 1601. cest estat eust esté impertinant. Le 24. Ianuier, par autre arrest il est dit que Galland affermera ce qui luy est deu par les Rouuets. Le 29. il leur baille coppie de toutes les pieces sur lesquelles depuis il a fondé ses demandes: Rouuet ne les debat pas de ladite quittance; mais dit simplement que Galland doit affermer si les payemens ont esté faicts de ses deniers. Le 18. Mars, par arrest il luy est adiugé la somme de deux cens escus, en deduction de ce qui luy peut estre deu à cause de ladite rente, & le surplus des deniers consignez luy demeure affecté. Le 16. Iuin il faict signifier aux Rouuets son affirmation. Si la quittance pretendue eust esté veritable, tant de circuits n'eussent esté necessaires, l'affirmatiō de Galland n'eust point esté desirée, il eust esté déclaré non receuable.

Depuis, le 21. Ianuier 1606. Galland intenta sa premiere demande contre Denise Rouuet pour auoir remboursement des arrerages par luy payez audit du Four, & l'vnziesme Decembre 1607. il forma sa demande seconde, concernant les autres fournitures: il ne se trouuera point qu'és aduertissement & contredits de la premiere instance, il ait esté faict mention de ceste quittance, n'y pareillemēt par les desfences & dupliques de la seconde: ce qui n'eust esté pas obmis si elle eust esté veritable, car elle eust tranché tout: Mais les partages ayans esté faicts entre les parties de leur succession cōmune, Denise Rouuet voyant que Galland demandoit com-



5  
pensation du rapport à elle adiugé, avec les autres sommes dont elle luy estoit redevable, alors elle fait paroistre ceste quittance pretendue, elle en fit bailler coppie le 27. Ianuier 1608. Comme la presentation de ceste piece fut inopinée audit Galland, le 28. il en fait arrest entre les mains de l'huissier: le 29. forme son inscription: Depuis il fait incessamment ses poursuites & sur la seule representation de la piece la Cour decrette contre Denise Rouuet, elle a esté interrogée & maintenu ladite piece.

Item, ceste quittance contient retrocession au profit des Rouuets de plusieurs choses cedées audit Galland pardeuât Notaires: il estoit bien raisonnable que la retrocession fut faite en la mesme forme, de peur de peril, aduenant perte de la retrocession.

Plus, elle porte qu'il a esté fait compte, avec ledit Galland ce neantmoins toutes les pieces iustificatiues de ses demandes sont pardeuers luy.

Est-il à croire que les parties ayans diuers affaires ensemble, Galland eust descharge les Rouuets, & que de sa part il n'eust point tiré de descharge & fut tousiours demeuré obligé.

*Addatur*, que l'an 1601. les Rouuets estoient grandement pauvres & miserables, & n'auoient pas moyen d'aquiter ce qu'ils deuoient audit Galland. Par les deux testaments de Rouuet, dont le dernier est de 600. il dit estre reduit a mendicité & en chambre garnie, il veut que l'on rende à la sœur de Lucas, la somme de trente trois escus vn tiers, qu'elle luy a presté pour ayder à viure: plus, se recognoist redevable de 65. sols enuers vn hoste de saint Leonard, auquel il a baillé en gage le manteau de son homme. S'il eust eu du moyen en Nouembre 1600. eust-il enduré de si grandes miseres? & d'où luy ont procedé les moyens pendant l'année 1601. dont il ait peu acquiter ce qu'il deuoit audit Galland?

Pour dernier moyen. Par ceste quittance de 601. les Rouuets se font retroceder & quitter diuerses rentes, Pour raison desquelles ils ont depuis intenté action contre ledit Gal-



land en l'année 1602. argument nécessaire que ceste piece n'estoit pas. Aussi de peur de tomber en quelque erreur plus grossier, il n'est point dit en quel lieu ceste piece a esté faicte: & n'est point signée par ceux au profit desquels elle estoit passée.

Denise Rouuet pour euter la peine exemplaire du crime, dit qu'elle a trouué la piece entre les papiers de son feu frere. Ce qui n'est pas suffisant, veu qu'il s'agit de son faict & de sa liberation propre. La piece a esté faicte par elle & par son entremise depuis le deceds de son frere, son frere n'en est point seruy, & n'est point cōprise en l'inventaire faict après le deces de Robert Rouuet: & elle interrogée a maintenu que le corps de l'écriture auoit esté mis deuant la signature. Ce qui est de son faict & cognoissance.


## COPPIE DE LA PIECE MAIN-

TENVE FAVLCE.

**I**E sous-signé confesse auoir quitté Robert Rouuet mon beau-frere & Denise Rouuet ma belle-sœur de l'interuention qu'ils ont faicte au mois de Feurier 1597. pardenant la Pie Notaire, au contract par moy faict avec maistre François du Four Aduocat en la Cour, par acte separé & de la sentence de condamnation par eux soufferte, ou sous-signé de leurs mains, pour raison de trois cens liures de rente & arrerages, restant à racheter des six cens liures de rente par feu leur pere constituée à dame Iacqueline Hurault dame de Mincy, pour ce que le tout n'a esté faict que pour m'asseurer de ce que ie suis responsable pour eux enuers ledit du Four, & qu'il n'est d'icelle rente rien deu selon la declaration que par cy deuant j'ay faicte le 15. Iuin 1580. Ie les quitte aussi du sort principal & arrerages de 25. liures de rente par eux & feu ma femme, constituée à Lamy en l'an 1595. pour auoir ledit principal & arrerages esté payez par eux de leurs deniers: comme en pareil, ie les quitte de iours les deniers que ie pourrois auoir baillé à feu leur mere & eux, ou feu Marie Rouuet leur sœur, pour auoir esté contez au conte faict entre madite femme & ledit Marie



Rouuet le 27. Mars 1590. Et encores ie les quitte de tous les deniers  
 qu'ils me pourroient deuoir, tant en general qu'en particulier, par  
 moy fournis pour leurs affaires de leur maison ou eux, moyennant  
 bon payement que i'en ay receu & bon compte que nous auons ce iour-  
 d'huy faict ensemble. En quoy faisant demeurent tous recepices,  
 comptereaux, bordereaux & autres chose que ie pourrois auoir d'eux,  
 nuls, moyennant ces presentes, faict le 8. Nouembre 1601. signé  
 GALLAND..







DEDVCTION QVE DENISE ROVVET DICT  
DEVOIR ESTRE FAICTE SVR LES SOMMES

*par elle deuës aux demandeurs, comme mis ex mains  
de leur deffunct pere.*

- |                                                                                                                                                                                                                                                                                                                                                                                                                                                                                                                                                                                                                                                                                                 |                                                                                                                                                                                                                                                                                                                                                                                                                                                                                                                                                                                                                                                              |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| <p>800. <i>escus.</i> Prouenant d'une rente constituée l'an 1599. destinez au paiement des arrerages deuz à du Four, ou son cessionnaire.</p> <p>200. <i>escus.</i> Touchez du Greffier des consignations en Mars 1609.</p> <p>66. <i>escus.</i></p> <p>200. <i>escus.</i> Payez à Dangleure cessionnaire de du Four, par Barrault l'vnziesme Iuillet 1598.</p> <p>200. <i>escus.</i> Par vne promesse de maistre Auguste Galland du 14. Iauier 1586.</p> <p>135. <i>escus.</i> Restas par le moyé d'un compte pretédu fait avec la femme dudit Galland le 17. Mars 1590. lequel est debattu.</p> <p>300. <i>escus.</i> Receus par ledit Galland du sieur Comte de Saignes le 6. Mars 1598.</p> | <p>Les demandeurs consentent deduire ces trois sommes sur les arrerages de la rente deuz à du Four.</p> <p>Ce paiement ne regarde point les demandeurs, qui ne demandent que ce qu'ils ont payé, si du Four ou son cessionnaire, ont plus receu qu'il ne leur estoit deu, cela gist en repetition.</p> <p>Feu maistre Auguste Galland a soustenu que ceste promesse est de l'an 1585. &amp; que le datte a esté alteré afin de la mettre dans l'an 1586.</p> <p>Ceste somme a esté touchée par ledit Galland pour remboursement de pareille somme par luy fournie au proces d'entre le sieur de Saignes, comme il est monstré en la production nouvelle.</p> |
|-------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|--------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|

De toutes les sommes cy dessus il n'y a que les trois premieres qui soient deductibles sur les arrerages de la rente. La quatriesme n'est considerable, n'ayant esté touchée par Galland.

Quant aux trois dernieres, elles n'ont rien de commun avec la rente. Et de fait posé qu'elles soiēt valables & veritables, Rouuet les a tousiours couché & employé à la descharge des prests & aduances mentionnez par les comptereaux, comme il se void par la lecture d'iceux.



# ESTAT DES SOMMES DEMANDEES

A DENISE ROVET, PAR M. AVGVSTE GALLAND,  
à cause des arrerages de quatre cens liures de rente, & despens par luy payez.

13. Aurl 1596.	100. escus.	
6. Mars 1597.	320. escus.	
28. Decembre 1599.	586. escus.	
1. Aurl 1600.	89. escus.	
14. Aurl.	31. escus.	36. fols.
der. Iuin.	60. escus.	33. fols.
Iuillet.	100. escus.	
4. Iuin 1601.	33. escus.	20. fols.
28. Aoust 1602.	180. escus.	
20. Octobre.	33. escus.	20. fols.
13. Feurier 1603.	16. escus.	40. fols.
3. Decembre 1605.	33. escus.	20. fols.
7. Decembre.	27. escus.	7. fols 11. deniers.
2. Iuin 1606.	43. escus.	40. fols.
11. Iuillet 1606.	28. escus.	47. fols. 6. deniers.

La quittance est produitte, Ne sert de rien,  
d'autant qu'elle est comprise en la suiuaute.

Les quittances iustificatiues de ces paye-  
mens faicts, tant à du Four que à Tyballier  
son cessionnaire, sont produittes.

*Nouvelle demande dudit Galland, pour diuerses fournitures & prestz faicts aux Rouuets, comprises en  
quatre diuers comptereaux escripts de la main de Robert Rouuet recognus.*

Les quatre estats contiennent tous concordamment les sommes cy apres.  
xx. escus ---- enuoyez aux Rouuets pendant les troubles.  
xxx. escus ---- rendus au sieur d'Aurat, qui les auoit presté ausdits Rouuets.  
xxx. escus ---- au sieur Belle.  
xx. escus ---- au sieur Beausemblant.  
c. escus ---- à eux enuoyez par ledit Galland.  
c. l. escus ---- pour les pensions de trois années de Denise Rouuet.  
c. xx. escus ---- pour vne année de la pension de Robert Rouuet.  
xxi. escu 28. fols.  
vn escu 37. fols.  
vi. escus 33. fols 6. deniers. } Payez à Gobert Apoticaire à Tours.  
ccclxx. escus ---- pour les espices du proces contre le sieur Conte de Saignés & rente de Lamy.  
ccclxxiiii. escus 20. fols ---- pour pensions de Robert & Denise Rouuets escheuës le dernier iour de l'an 1598.  
xxvii. escus ---- pris par les Rouuets de certain argent deposté entre les mains dudit Galland par les sieurs  
Chauueaux.  
l. fols ---- pour coppies par le premier & second compte.  
lxxiii. escus 37. fols ---- recognus par lesdits comptes auoir esté fournis pour ladite Denise pendant sa mala-  
die de la contagion.


*Oultre les sommes contenues ausdits estats, sont encores deües les sommes qui ensuiuent.*

lxxxii. escus 30. fols ---- recognus par D. Rouuet auoir esté fournis par ledit Galland pour les vaccations au  
proces contre la Damoiselle de Laulbe.

*Plus pour prestz faicts depuis l'an 1585. iusques en 90.*

lxxvi. escus 40. fols.  
cclxxxvi. escus 16. fols.  
cviii. escus 34. fols.  
xl. escus.  
xxxix. escus.  
v. escus 17. fols.  
xxvii. escus 25. fols.  
cxix. escus.  
xxi. escu 28. fols 6. deniers.  
vn escu 26. fols.

Toutes ces sommes sont iustificées par des comptereaux, escripts, arrestez  
& sommez de la main de Robert ou Denise Rouuets, recognus deuant  
Monsieur Florette.







DED

800. esc.

200. esc.

66. esc.

200. esc.

200. esc.

135. esc.

300. esc.

Der

deducé

ble, n'a

Qua

de faic

couch

les cor



*... de l'An. Audlauden et*

4  
u  
2  
k  
le  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32  
33  
34  
35  
36  
37  
38  
39  
40  
41  
42  
43  
44  
45  
46  
47  
48  
49  
50  
51  
52  
53  
54  
55  
56  
57  
58  
59  
60  
61  
62  
63  
64  
65  
66  
67  
68  
69  
70  
71  
72  
73  
74  
75  
76  
77  
78  
79  
80  
81  
82  
83  
84  
85  
86  
87  
88  
89  
90  
91  
92  
93  
94  
95  
96  
97  
98  
99  
100

